



SYED SALEH (tengah) menyantuni petugas media Tabung Haji dengan memotong kek bagi meraikan sambutan Hari Wartawan Nasional 2023 di Abraj Al-Janadriyah, Mekah semalam.

Ekoran amaran hujan lebat, ribut pasir, banjir kilat

Tiada perubahan jadual jemaah – TH



Seruan Baitullah

Bersama
**MOHD. TURMADZI
MADUN**

Melaporkan dari Mekah

MEKAH – Tiada sebarang perubahan pada aktiviti dan program yang telah diatitkan untuk jemaah haji ekoran pengumuman amaran hujan lebat, ribut pasir dan banjir kilat yang dikeluarkan direktorat pertahanan awam Arab Saudi baru-baru ini.

Ketua Rombongan Haji, Datuk Seri Syed Saleh Syed Abdul Rahman berkata, setakat ini, amaran yang dikeluarkan pada 26 Mei lalu dan berlarutan sehingga Rabu ini itu tidak menyebabkan

malapetaka atau bencana yang boleh menyebabkan pergerakan terbatas.

Bagaimanapun, katanya, jemaah dinasihatkan supaya sentiasa berhati-hati dan peka dengan maklumat terkini yang disalurkan melalui kumpulan WhatsApp untuk kumpulan masing-masing dan aplikasi THhujjaj.

“Petugas maktab dan zon di Tanah Suci telah mengambil maklum dan sentiasa memantau serta menasihati jemaah supaya sentiasa peka dengan keadaan.

“Jemaah dinasihatkan supaya berada di dalam hotel atau masjid jika berlaku hujan lebat dan angin kencang dan hanya keluar apabila keadaan reda. Setakat ini ia tidak mengubah perancangan yang telah diatur untuk jemaah,” katanya pada sidang akhbar di sini semalam.

Menurut Syed Saleh, cuaca di Arab Saudi kini mencecah 42 darjah Celsius dan jemaah dinasihatkan supaya tidak terdedah terlalu lama di tengah panas.

Syed Saleh turut memohon rakyat Malaysia mendoakan operasi haji kali ini berjalan lancar seperti dirancang selain meminta supaya kesemua 31,600 jemaah dijauhkan daripada sebarang perkara memudaratkan.

Sementara itu, Syed Saleh turut sudi meraikan sebahagian petugas media yang membuat liputan operasi haji tahun ini sempena sambutan Hari Wartawan Nasional 2023 dalam satu majlis ringkas semalam.

Antara media yang membuat liputan kali ini termasuk *Kosmo!*, *Utusan Malaysia*, *Bernama*, *Berita Harian*, *Sinar Harian*, *Radio Ikim*, *TV3*, *RTM* dan *TV Al-Hijrah*.